

四庫全書

集部

欽定四庫全書

集部
宋元詩會卷八

詳校官中書_臣陸 湘

主事銜_臣徐以坤覆勘

總校官知縣_臣繆 琪

校對官中書_臣牛稔文

謄錄進士_臣沙重輪

欽定四庫全書

宋元詩會卷七

兵部主事陳焯編

韓琦

字稚圭相州安陽人弱冠舉進士名在第二方唱
名太史奏日下五色雲見左右皆賀授將作監丞
通判淄州入直集賢院監左藏軍歷開封府推官
三司度支判官拜右司諫奏罷宰相及參政無能
者四人凡事有不便輒極言之由知制誥安撫益
州活饑民百九十萬副夏竦為陝西經略招討使
尋兼安撫秦鳳與范仲淹威名同重一時天下稱
為韓范人為樞密副使以羣小多異議請外任嘉

祐元年拜同中書門下平章事封儀國公力請定
儲英宗立太后垂簾聽政寺人構兩宮成陳賴琦
調護人情乃安及還政拜右僕射封魏國公再請
英宗建儲以安社稷神宗即位進司空兼侍中年
六十八薨贈尚
書令諡忠獻

啄木

剝剝復卜卜意若念良木營營求蠹心未獲空我腹或
露一襠紅或展雙翅綠捷緣都盧撞響弄羯鼓曲搜索
不知疲利嘴信推禿忽爾破奸穴種類無遺族內孽固
難辨一發知潛伏彼實害珍材盡殄此非酷直疑天意

深不使嗜梁肉專為衆靈仇待飫弗與足如今知庶味
恣擇蟲與粟杞梓任陰賊長喙罷攻觸飽食作羣飛時
下泉沼浴歸鳴涼樹陰暮趣高枝宿

苦熱

皇祐辛卯夏六月朔伏暑始伏之七日大熱極炎苦赫
日燒扶桑焰焰指亭午陽烏自焦鑠垂翅不西舉炙翻
四海波天地入烹煮蛟龍竄潭穴汗喘不敢雨雷神抱
桴逃不顧車裂鼓豈無堂室深氣鬱如炊釜豈無臺榭

高風毒如遭蠱直疑萬類繁盡欲變脩脯嘗聞崑閬間
別有神仙宇雪散滌煩襟玉漿清濁腑吾欲飛而往於
義不獨處安得世上人同日生毛羽

畫錦堂

古人之富貴歸於本郡縣譬若衣錦遊白晝自光絢不
則如夜行雖麗胡由見事累載方冊今復著俚諺或紆
太守章或擁使者傳歌樵忘故窮滌器掩前賤所得快
恩仇愛惡任驕恠其志止於此士固不足羨茲予來舊

邦意弗在矜銜以疾而量力懼莫稱方面抗表納金節
假守翼鄉便帝曰其汝俞建纛往臨殿行路不云非觀
歎溢郊甸病軀諧少休先隴遂完繕歲時存父老伏臘
潔親薦恩榮孰與偕衰劣愧獨擅公餘新此堂夫豈事
飲燕亦非張美名輕薄說紳弁重祿許安閒顧已常兢
戰庶一視題榜因念報主眷忠義聳大節匪石烏可轉
丹忱難悉陳感泣對筆硯

和袁陽節推龍興寺芍藥

廣陵芍藥真奇美名與洛花相上下洛花年來品格卑
所在隨人趨高價接頭著處騁新妍輕去本根無顧藉
不論姚花與魏花只供俗目陪妖姍廣陵之花性絕高
得地不宜歸造化大豪大力或強遷費盡擁培無艷冶
東君固是花之主千苞萬萼從榮謝似嬌東君汎愛心
枉殺東風不肯嫁遂令天下走香名鬢髯丹青競誇詫
以此揚花較洛花自合揚花推定霸其間絕色可麤陳
天工著意誠堪訝仙家冠子鏤紅雲金線妝治無匹亞

旋心體弱不勝枝寶髻敢斜猶墮馬冰雪肌膚一纈斑
新似守宮明似赭雙頭兩兩最多情象物更呈鞍面窠
樓子亭亭欠娉媚特有怪狀堪圖寫見者方知畫不真
未見直疑傳者詐前賢大欲巧賦詠片言未出心先怕
天上人間少其比不似餘芳資假借我來淮海涉三春
三訪龍興舊僧舍問得龍興好事僧每歲看承不敢暇
後園栽植雖甚蕃及見花成由取捨出羣標致必驚人
方徙矮壇臨大廈客來只見軒檻前國艷天姿相照射

因知霸種本自然須憑精識能陶冶君子果有育材心
請視維揚種花者

按詩內治韻重押或以音同而義別也

答章望之秘校惠詩求古瓦硯

魏宮之廢知幾春其間萬事成埃塵惟有昭陽殿瓦不
可壞埋沒曠野迷荒榛陶甄之法世莫得但貴美璞踰
方珉數百年來取為硯墨光爛發波成輪求之日盛得
日少片材無異圭璧珍巧工近歲知衆寶雜以假偽窺
錢緡頭方面凸槩難別千百未有二三真我來本邦責

鄴令朝搜幕索勞精神遺基壞地徧剝窟始獲一瓦全
元淳蘇斑著骨尚乾翠夜雨點漬痕如新當時此復近
簷溜印以篆字花其唇磨礱累日喜成就要完舊質知
無倫吾才寡陋不足稱思與好古能文人好古能文今
者誰武寧祕書章表民無詩尚欲兩手付何況大雅之

奏聞鏗純

一作
韶鈞

寓目

擁傳脩途倦逢春旅思長遠煙含樹色細雨起塵香隴

夢成行綠林鶯並對黃楊鞭聊自慰舉目見韶光

春晴

霽色破春昏高樓日未曛林梢零舊雨山頂入殘雲醉
粉勻花頰風羅皺水紋踏青人誤約芳思幾紛紛

春霖

咫尺東郊路春霖絕未通銷間生奕思醒睡費茶功樓
迴昏昏霧牕寒霎霎風待晴桑陌上五馬恣璁瓏

後園春日

并塞園林古春來似不知雨輕成凍易樹老發花遲劇
事隨年倦歡悰入病衰芳時期強賞宴鼓揭天槌

和春卿學士上元罷燈

絲竹沈聲月泛波警宵方喜罷誰何樓深酒密客留易
路遠香殘人去多寒燭倚蓮猶結淚淡雲歸隴不停歌

那知夢穩瀛洲上正是釣天九奏和

是夕館宿聞
宮中奏樂

謝丹陽李公素學士惠鶴

高籠攜得意何勤玉樹慚無可待君只愛羽毛欺白雪

不知魂夢託青雲孤標直好和松
畫清唳偏宜帶月聞
自有三山歸去路莫辭時暫處鷄羣

北塘春雨

葉葉輕雲帳薄羅坐看膏澤灑庭柯
風前芳杏紅香減
煙外垂楊綠意多聲落簷牙飛短瀑
點勻池面起圓波
晴來西北凭欄望拂黛遙峰濯萬螺

暮春康樂園

榆莢紛紛擲亂錢柳花相撲滾新
綠一年寂寞頻來地

三月芳菲已過天，樹密只喧間鳥雀。
臺高猶得好山川，病夫不飲時如此。
徒有詩情益自然。

春陰馬上

正是風和日暖天，重陰凌擾苦纏綿。
蕉心自結憑誰展，柳眼慵開只待眠。
草濕謾鋪留醉席，榆寒難擲買春錢。
幾時霞外氛靈散，放出紅輪一丈圓。

登廣教院閣

岑寂禪扉啟畫關，公餘為會一開顏。
高臺面疊色平野。

老柏參天礙遠山
花去春叢蝴蝶亂
雨勻朝圃桔槔閒
徘徊軒檻何時下
直待前枝倦鵲還

北塘避暑

盡室林塘滌暑煩
曠然如不在塵寰
誰人敢議清風價
無樂能過白日閒
水鳥得魚常自足
嶺雲含雨只空還
酒闌何物醒魂夢
萬柄蓮香一枕山

暮春書事

榆莢空飛不算錢
韶光歸速置何緣
惜春情味過年少

戰酒英雄退日前竹筍迸堦抽兕角楊花鋪水漲龍涎
妖妍萬變成凋謝長養須資大夏權

乙卯晝錦堂同賞牡丹

從來三月賞芳妍開晚今逢首夏天料得東君私此老
且留西子久當筵柳絲偷學傷春緒榆莢爭飛買笑錢
我是至和親植者雨中相見似潛然

九日水閣

池館隳摧古榭荒偶延嘉客會重陽雖慚老圃秋容淡

且看寒花晚節香酒味已醇新過熱蟹黃先實不須霜
年來飲興衰難強漫有高吟力尚狂

壬子十一月廿九日大雪

近臘猶慳六出繁忽驚盈尺及民寬萬方蒙澤人人賀
通夕無風陣陣乾危石蓋深鹽虎陷老枝擎重玉龍寒
欲知靈鷲銀為界試陟高樓一望看

和春卿學士柳枝詞

五首

陌閒宮古綠煙迷惹盡春愁困拂堤卻為多情足離恨

故教溝水亦東西

淡煙輕日簇誰家微出青旗一帶斜對景似嫌春意老
更搖踈影掃殘花

畫橋南北水連天纔聽鶯聲又晚蟬長使離魂容易斷
春風秋月自依然

曲江風煖曉陰斜翠色相宜拂鈿車自是春眠慵未起
日高人困又飛花

葉葉新長約黛蛾絲絲輕軟任風梭啼鶯便學歌喉轉

知是春來舞意多

文彥博

字寬夫汾州介休人少與張昇高若訥從穎昌史
炤學炤母異之曰貴人也及進士第知翼城縣通
判絳州為監察御史詔置獄河中鞠治黃德和誣
劉平降叛得實德和就誅名震中外以直史館遷
轉運使知泰州益州召拜樞密副使參知政事出
為貝州宣撫使定王則之亂械則送京師拜同中
書門下平章事集賢殿大學士以御史唐介劾奏
罷為觀文殿大學士出知許州尋復平章事與富
弼同拜時以得人為慶至和三年正月仁宗不豫
內侍史志聰等詭秘無狀彥博與同列劉沆富弼
謀啟醢大慶殿因留宿殿廬帝疾愈彥博等始歸
第當是時京師人情洵懼賴此以安久之出判河

南府封潞國公英宗即位知其首建立儲之議甚
德之彥博遜避不敢當除侍中熙寧間為王安石
所惡力引去元豐三年拜太尉復判河南曾王同
老言至和中議儲事神宗追念前勲益加寵遇因
請老以太師致仕元祐初命平章
軍國重事薨年九十二謚忠烈

燕川渡

蚤過燕川渡千峰插太虛雲開微見日水淺不侵車風
急樵歌響霜嚴木葉疎緣溪東北去巖後有精廬

關山月

蕩子久行役遼西戍未還佳人怨遙夜清淚浥朱顏蘚

晦蘭閨寂塵昏寶鏡閒相思不相見明月下關山

送彌陀實師訪積慶西堂順老

好去三摩地相逢兩會家
禪心究實際慧眼絕空花
聞在東林日常烹北苑茶
願將甘露味餘灑濟河沙

端居多暇懷洛成詩家
運使兵部俯垂屬和賦謝
倦翼念歸林幽懷動越吟
更回谿叟信深契野雲心
巴里傳高唱英韶繼善音
便須傳洛社紙價重千金

留守相公寵示東田讌集詩依韻奉和

嘗同徐勉構東田花竹成陰雨後天為愛霜臺寬白簡
得隨津閣看紅蓮清樽屢醕吟情逸翠袖頻翻舞態妍
歸興直須三鼓盡月華應是十分圓

留守相公用雅章召赴東樓再次來韻

朱樓華閣府園東蝸陋仍依美庇中儉幕深嚴逢綠水
楚臺高迥快雄風四絃清切呈新曲雙袖蹁躚試小童
況是元規興不淺歸軒爭敢便匆匆

知府學士堯夫寄詩曲念衰老依韻和呈

幾年洛社盍朋簪
照席瓊枝秀出林
月夕同遊詩筆健
花時共賞酒杯深
帝綸中出榮開府
使節西馳愴判襟
遠寄佳章念衰朽
知君最有歲寒心

西歸日瓊林苑賜宴即席

竊祿叨榮四紀餘
退思僥倖亦無如
趨朝再覩新宮省
解紱還歸舊里廬
報國丹心明皎皎
戀軒疲足去徐徐
羣公盡出都門祖
盛事先於漢二疏

臣伏蒙聖恩
今月二日就瓊林苑特遣中使寵賜

御詩曲推恩禮過獎愚臣感愧之深負荷弗克
輒課愚陋恭和聖製

老臣為感聖恩殊趣治輕裝覲帝居錫宴便蕃親鳳展
賜章重疊捧龜書康時有志才終短報國無功術已疎
身在洛陽心魏闕願傾丹懇上公車

送圓明大師歸吳興

數曲清琴達舜聰瑤津仙苑助熏風朝端多士知音久
雲上故棲歸思濃命服鮮華新爛熳行裝輕簡舊焦桐

鄉人若問大檀越盡在名經千部中

謝事歸老洛陽留守相公王汝寵惠佳篇賦荅

二聖恩深念老臣許從休退樂伊濱重觀景物皆塵迹
喜見居留是故人林下放懷無簡束樽前道舊長精神
公雖久作東田伴卻佇黃樞秉化鈞

野意

引得清伊一派通三灣相接勢無窮便成渺渺江湖趣
更有蕭蕭蘆葦風西洛當年為勝地東田今日屬衰翁

藥園事跡分明在盡見雲鄉舊記中

和吳諫議寄題廣化寺

淨居高揭四禪天更對伊嵩闢廣軒
塔聳千花依鷲嶺舟浮一葉上龍門
雲藏古木當危檻風遞疎鐘過遠邨
我有草堂南澗口但逢西望欲銷魂

次韻留守相公玉汝見東

東郊瘠土纔千畝繞舍團椒僅百家
地接玉泉多草木路經緱嶺少風沙
能留過客雖無饌時對清尊亦有花

昔日相君曾降顧常憂蝸陋不容車

次韻秦帥經畧呂通議過洛少留

喜過西都暫解鞍尊前不惜醉酡顏推襟道舊從容久
落筆成詩頃刻間塞外定知威令肅幙中常得雅歌閒
相門出相歸人望瑣闥難淹侍從班

奉陪伯溫中散程伯康朝議司馬君從大夫席於
所居小園作同甲會

四人三百十二歲況是同生丙午年招得梁園工賦客

合成商嶺採芝仙清談疊疊風盈席素髮飄飄雪滿肩
此會從來誠未有洛中應作畫圖傳

荅龐相許枉過家園不果先以詩來次韻

一廛幽趣斗城西竹映軒牕柳拂堤園吏每誇風物美
主人常歎簿書迷碧池荷動觀魚戲朱檻梧傾待鳳棲
惟願毗耶長者至莫憂花裏有鶯啼

清明日玉津園賜宴即席

節應桐華始筵開禁苑新推恩緣舊物加惠及陳人衆

樂聞天奏同寅會
柄臣蘭有享豐潔
桂醕酌芳醇覆育
需雲廣涵濡湛露
均桑榆垂晚景何
路報堯仁

遊東田八韻

文物平津閣風流太傅山
勝遊松島外故迹藥園間
霜葩編為屋寒荆刈作闌
牕櫺雲漠漠畦竇水潺潺
蘆渚炊煙起萍漚釣艇還
竹經朝雨翠荷借夕陽殷
幽興能招隱高情自愛閒
從來行樂處攜手一開顏

提舉端明見示三月晦日雨中書懷詩次韻

春光垂欲盡夏景漸增添鬱鬱松篁茂蕭蕭風雨兼
花心隨絮落履齒被苔粘巧囀鶯遷木驚飛燕入
簾蝦鬚穿曲沼虎爪度前簾坐久香銷炷吟多筆費
尖雲容方靄靄日色未熒熒舞鶴傾丹頂遊龜散
綠髯命賓常務率出令更須嚴詩詠當階藥書尋
傍架籤蘭芬衣可襲露潤草俱沾貴近辭金馬編
修賜玉蟾高歡惟自適獨樂未嘗厭赤白曾諳丙
丹青每誚閭冲和緣養浩寂寞為安恬身處貧無
愧心貪道不廉成文推大手濟用鄙

輕縑視履循清節祈恩陋雜占聞韶欣鳳舞在藻愛魚
潛鱸膾思漁艇貂冠望酒帘聖時非吏隱賢業繫民瞻
撫事惟公論擣辭乃自謙保躬誠易退康世義難淹類
句慙無取酬言幸不嫌

次韻留守相公同遊龍門

鑿開青嶂啟天門直瀉伊流淺汝濱八節驚濤鼉振鼓
千花寶堦鴈翔雲嵒隈雨過飛泉漲谷口風回墮葉紛
龕穴窿穹三像列樓臺葉煥兩崖分方陪茜旆來尋勝

不就蒲餐趣茹葷北里笙竽皆擁從東山羅綺半酣醺
升堂共覩皤仙貌策杖同尋古士墳喜脫貂冠親野老
幸隨熊軾附邦君林巒岑寂真堪賞市井喧譁漸厭聞
人度長川猶隱映香銷古殿尚氤氲周生歸後蘭重佩
荀令行時蕙更熏曉露未晞珠滴淚秋花爭發錦挑紋
羣娃散步塵生襪小舫爭登水濺裙釣叟旁觀皆歎羨
禪師迎謁盡歡欣既無冗局羈閒迹忍促回軒背夕曛
得向石頭溪上飲從今遂不畏移文

耆老會詩

九老唐賢形繪事元豐令勝會昌春垂肩素髮皆詩彥
揮麈清談盡席珍染翰不停詩思健飛觴無算酒行頻
蘭亭雅集誇脩禊洛社英遊忝序賓自愧空疎陪几杖
更容款密奉簪紳當年尚齒尤多幸十二人中第二人

憩鶴堂

再到靈都訪勝遊青山依舊白雲秋燒丹帝子今何在
憩鶴仙人跡尚留

題郭熙畫

淺水深山曲逕通樵夫涉水出林中
可憐畫筆多情思
寫入霜紈一扇風

荅吳幾復

君說歸期未有期西風又是鱸鱸時
何當會集香山伴
同赴松牕竹下棋

上巳阻雨

林花脈脈怯朝煙雨隔蘭亭曲水筵
欲買春花無定價

東風撩亂擲榆錢

宮詞

體輕浸不勝驚釵常羨同心上苑梅翠輦未過珠箔卷
漆盤猶貯夜明苔

張俞

宇少愚益州郫人少俊偉有大志屢舉不第用薦
除秘書校書郎願以授父顯忠而自隱於家文彥
博治蜀為築室青城山白雲谿以處之母死再菴
鹽酪未嘗入口所持柳杖植墓旁忽生枝葉後至
合抱凡六召不起卒其妻蒲氏
賢而有文為誄詞甚傳於世

府衙新書堂

志士營道日築室養賢名鋤荒出幽邃掃室迴虛明山
嶽凌牆壁溪塘瀉牕楹蘭蘅露景晚松桂秋風生琴瑟
嫺古奏樽壘湛寒清默意馳萬象遊心覽八紘羣經互
粲粲百氏紛營營禮樂立制作文章縣準程唐虞化已
遠周禮道尚行師友得正士講論無俗聲邪哆不可入
紛華固難傾修辭力工巧厲學逾農畊天爵既自後人
文取其榮元侯方作鎮列士爭獻成學校溢都市謳吟

洽黎氓寧同稷下議飽食談縱橫

宴萬州西山池亭柬魯使君

西嶺鬱盤紆寒泉注原隰下有乖龍池何年此殊極復
為龜鼉據亂我清泉色松幹已交摧石牙空鬪立魯侯
獨窮勝公暇日尋陟蕩滌潢汙流宛如疏鑿力池光復
涵徹萬象如鏡入亭觀出浮雲彤彤映邦域左右浮屠
宮巋然爭業岌昔乃荆棘荒今為蘭蕙襲密樹低華陰
嘉禽弄文翼使君池上宴何減襄陽習

越公堂

越公作隋藩烈烈耀威武駐馬白帝城營營壓巴楚俯
瞰萬里流徘徊覽千古鬼工役精魄梓制銜刀斧四阿
無欒櫨大厦惟柱礎崢嶸露節角孱豁轉檐廡丹漆久
磨滅風雲尚吞吐

蠶婦

昨日到城郭歸途淚滿巾遍身羅綺者不是養蠶人

金剛臺

霧山環合自雲川戶有清溪種玉田萬本桃花不知處
幾人曾得問秦年

石延年

字曼卿由幽州徙家宋城為人跌宕任氣讀書通
大畧於詩最工累舉不第真宗錄二舉進士為三班
奉職延年恥不就張知白數奇之曰母老乃擇
祿耶延年不得已就命以右班殿直改常祝知金
鄉縣有治名兩為通判擢館閣校勘歷
光祿大理寺丞遷中允判登聞鼓院卒

送劉潛歸陶邱

丈夫未大用身與仁義間可堪更聚散風塵摧其顏君

今歸柯澤路出梁宋間梁宋有吾廬親老待兒還矧復
君先歸因之頭益斑春老有時回人老不再少草白有
時榮髮白不再好人生不如春髮生不如草送別春草
前人意先春老

瀑布

飛勢挂岳頂無時向此傾玉虹垂地色銀漢落天聲萬
丈寒雲濕千巖暑氣清滄浪何足羨就此濯塵纓

金鄉張氏園亭

亭館連城敵謝家四時園色鬪明霞
牕迎西渭封侯竹地接東陵隱士瓜
樂意相關禽對語生香不斷樹交花
縱遊會約無留事醉待參橫月落斜

曹太尉西師

仁者雖無敵王師尚有征獨乘金廐馬
都領鐵林兵肅氣關河暮屯烟部落
晴旗光秋燒合甲色夜江橫士喜擊
中鼓敵疑聞後鉦寒踰博望塞春宴隗
囂城外使羌心伏旁資帝道平公還
如畫像為贊學班生

黃亢

字清臣建州浦城人少奇穎年十五以文謁學士
章得象甚奇之遊錢塘投詩林逋逋尤激賞王隨
知杭州奏禁西湖為放生池亢作詩數
百言以諷士人爭傳誦焉詩號東溪集

臨水

人生朝復暮水波流不駐去年此日水今日到何處惆
悵雨殘花嫣紅隨水去花落水東流識盡人生事

呂夷簡

字坦夫其先萊州人徙壽州進士及第補絳縣軍
事推官遷大理寺丞通判通州徙濠州歷知濱州

擢提點兩浙刑獄遷祠部員外郎為建宮觀奏恤
工徒真宗曰是有為國愛民之心改刑部員外郎
兼侍御史知雜事改起居舍人知制誥進龍圖閣
直學士權知開封府有治聲上為書名御屏仁宗
即位拜右諫議大夫叅知政事進戶部侍郎同中
書門下平章事罷為武勝軍節度事判陳州蓋出
郭皇后意也歲中夸簡復相遂主廢郭后之議時
論少之會與王曾廷辯罷知天雄軍未幾以右僕
射再入相封許國公以太尉
致仕薨謚文靖有集二十卷

江南立春日

灰律何時應江春昨夜來細風先動柳殘雪不藏梅餘
冷迷清管微和發凍醅閉門無客到樽俎為誰開

天華寺

賀家湖上天華寺一一軒牕向水開不用閉門防俗客
愛閒能有幾人來

張環

字唐公洎之孫也舉進士以妻父王欽若嫌召試
學士院賜第除祕閣校理同知太常禮院謚錢維
演曰文墨其子工訴環條對甚切終莫能奪
乃賜謚曰思判吏部南曹歷推官轉運使

寄題徑山懷郎簡侍郎

天地一州渚北平南歆危幽并深以厚江淞清且奇武

林頗英秀川匯仍山卑應接殫天巧類非人力為徑山
最佳處有巖稱玉芝居防俗士駕地乃賢人宜郎公留
名德平時為羽儀引年歸故里不復衣朝衣留侯黃石
心白傅香山期結字名勝外日與塵事違伊予來東藩
濫持使者麾當候秋風高遠造巖下扉澣濯纓上塵散
步松間綦未能繼高躅聊用慰所思

郎簡

字叔廉杭州臨安人幼孤貧借書錄之多至成誦
進士及第補試秘書省校書郎知寧國縣真宗嘗

曰簡歷官無過而無一人薦是必恬於進者改著作佐郎知分宜縣擢祕書少監知廣州入判大理寺以工部侍郎致仕年八十九

訪徐冲晦

湖上訪高士徑深行綠苔應聞山犬吠知是野人來岸幘出相接柴門自為開林間清話久薄暮榜舟回

曹汝弼

歛之休寧人天禧祥符間所謂詩人曹夢得是也有詩一百五十首行世曰海寧集職方舒雅序之其後嗣昌咸舉進士登仕籍者數十人

中秋月

年年相對賞永夜坐吟牀衆望自疑別孤高非異常園
林分淨影臺榭起餘光誰似蟾宮客得攀仙桂香

懷寄披雲峰誠上人

院高窮木杪野極靜無言險路通巖頂香泉出石根微
風飄磬韻幽鳥啄苔痕常記相留夜秋堂共聽猿

再寄

江城從別後聞說在松間度日長扃戶終年不下山靜

為詩所役閒免事相關應喜雲邊客冥按鬢未班

贈披雲峰岳長老

禪外掩松扃閒眠度歲陰雨侵香篆濕苔長屐痕深水
在銅餅冷雲歸玉磬沈前山有靈藥時策杖藜尋

贈僧

一從叨命服乘興入天台院接石橋住門臨瀑布開松
間應獨坐雪裏更誰來時復攜藜杖看雲上古臺

喜友人過隱居

忽向初春候閒過隱士家旋收松上雪來煮雨前茶禽
換新歌曲梅妝隔歲花應慚非遁者難久在烟霞

富弼

字彥國河南人少篤學有大度范仲淹見而奇之
曰王佐才也仁宗復制科舉茂才異等授將作監
丞簽書河陽判官召知諫院所陳奏皆關中外大
利害上多從之以事忤宰相呂夷簡因薦弼報聘
出塞意如盧杞之陷顏真卿而弼毅然就道卒能
伸國威以全和好遷翰林學士進樞密副使皆固
辭不拜上再三示特用之意非為使遠故始受命
久之為夏竦所中請外出知鄆州歷京東路安撫
使活饑民五十餘萬人至和二年召拜同中書門
下平章事與文彥博並命士大夫相慶於朝嘉祐

六年以母憂去位詔為特罷春宴英宗立封祁國公進封鄭熙寧二年以左僕射門下侍郎同平章事時王安石柄用弼度不能爭章十上求退加拜司空進封韓國公致仕年八十薨謚文忠

定州閱古堂

天下十八道惟河北最重河北三十六州軍就其中又析大名府定州真定府高陽關為四路惟定州最要定為一路治所實天下要重之最知是州者兼本路兵馬都部署居則治民出則治兵非夫文武才全望傾於時者不能安疆場屏王室也然自國初已來

專以武臣帥諸路慶曆七年甘陵妖賊據城叛河北妖黨相搖以謀應卒驕將懦人心大震天子悟始議選儒臣帥四路以督諸將迺起知鄆州資政殿學士給事中昌黎韓公帥真定以遏亂萌明年春賊誅人安既而夏大雨河決商胡東北入於海河北灾人復不寧流徙失業者四出咸不翅千里僵殍滿道天子恤然且虞他姦遂以公帥定定既要重天下宿兵素多屬傷殘之後官民枵困征賦逃無幾而兵不少減

兵襲舊幸歎益驕以悍公夙夜裁整以威以懷兵之
驕不從令者捽其首惡斬以徇略為條教餘怙怙就
約不敢譁於室至有調發者遠而彌戢如公親臨已
而招集逋亡四流爭還如啼孩奔父母惟恐其後至
則充然各得其欲農無廢隴賦有餘粒不旁誅橫斂
而上下足堙漏補罅一面完固公既擊彊梗之兵又
育彫瘵之民左行斧鉞右哺飲食亂者畢治亡者畢
存禮法政教向之人所不得聞者今漸濡酣飫無不

貫徹自是邊人革其耳目新其肝腸優為而樂從故
人易治而功成速也又明年秋天子圖公之功詔加
大學士公先嘗表其志幸終三年不願亟易也至天
子抑騎名而使即以授姑遂公請亦以慰斯人愛公
之心也公惕寵處官雖無事未嘗輒自豫念兵與民
之急宜無過者矧臨要重之路憂虞所繫凡是謀畫
不可以無法乃擇取歷代賢守良將總若干人行事
創大屋以類相次繪於周壁榜之曰閱古堂蓋欲閱

古之人所為而為之法也噫公雅文傑武自當視乎
古人且天下方遯公入輔以致太平若其安疆場屏
王室豈庸考古而後能哉實公冲然不自有其有而
歸乎古人也其縣知來者不師繪事而公是師也雖
然躅古蒐善惠人警已公之意謂其至矣乎公郵問
索詩因粗序所致之旨以誌其始而示於後詩曰

朔方之兵勁於九土尤勁而興要惟定武兵勁在馭用
則羆虎失馭而勁驕不可舉曰保曰貝閉壁連阻武爵

斯守束手就鹵皇帝曰噫汝武曷取有弊必革以勤於
撫公來帥定始以威怒有兵悍橫一用干斧連營但之
膽栗腰偃既懼而教如舖如乳以刺以射以鉦以鼓無
一不若師師旅旅列城自刺靡不和附陰沴為梗降此
大雨大河破洩在河之澍民被黷墊田入污莽流離蕩
析不得其所公慙曰吁予敢寧處迺大招來乃大保聚
乃營帛粟寒衣饑茹民歸而安水下孰禦強弱死生由
公復慮曰義曰仁震肅春煦合和蒸天天順以序公境

獨稔爰麥爰泰公俗獨樂夫耕妻杼人雖曰康公亦奚
豫謂此一方民與兵具務劇任重稽古其裕人皆謂公
與古為伍公文化民公武禦侮何思古人公不自許遂
擇奇匠繪於堂宇列其行事指掌可數前有古人在我
門戶後有來者依我牆堵斯堂勿壞有堂有故堂之不
存來之曷覩宏乎煥乎千載是矩

涵虛閣

畫閣高連百雉城涵虛應不愧標名門前柳色兼旗色

座上琴聲雜佩聲肯羨五湖歸范蠡未饒三徑隱淵明
我來恰值初晴後山色波光分外清

唐介

字子方江陵人父沒漳州漳人知其貧合錢以贖
介年尚幼悉謝不取擢第為武陵尉調平江令知
莫州任丘縣縣當邊使往來素苦誅索介至皆帖
伏以去人為監察御史裏行轉殿中侍御史會張
堯佐除四使論奪其二因劾宰相文彥博守蜀日
造奇錦媚宮掖以得執政復用堯佐自固請罷之
帝怒貶春州別駕改置英州由是直聲動天下無
何復召為御史言事益無所顧他日自請解職連
歷外任入為待制復知諫院以論罷陳升之出知
洪州治平元年召為御史中丞明年以龍圖閣學

士知太原府熙寧元年拜叅知政事數與王安石
爭論安石強辯而帝主其說介不勝憤疽發於背
薨年六十贈禮
部尚書謚質肅

寄杭州孫資政

何人富貴不圖安大抵為臣節欲完手執樞機謀國易
心存忠義入時難臨風未覺龍媒老衝斗誰知劍氣寒
天子聖神思舊德肯教旌馭久盤桓

宋元詩會卷七

欽定四庫全書

宋元詩會卷八

兵部主事陳焯編

范仲淹

字希文，其先邠州人，後徙家蘇州吳縣。仲淹二歲而孤，母再適長山朱氏，從其姓。遂名朱說。既長，知其家世，乃感泣辭母去。之應天府，依學於戚同文。晝夜不息，雖饑寒弗知苦也。舉進士第，為廣德軍司理參軍，迎母歸，養改集慶軍節度推官。始復姓，更其名監泰州鹽稅，用晏殊薦，為祕閣校理。每發憤論天下事，無所鯁避。一時士大夫矯厲尚風節，自仲淹倡之。仁宗知其忠，進右司諫。會郭后廢，伏

閣爭之不得出知睦州徙蘇州拜尚書禮部員外郎累遷吏部權知開封府忤宰相呂夷簡罷知饒州元昊反召為天章閣待制知永興軍改陝西都轉運司副夏竦經畧兼知延州規畫戰守帝悉從其議無何以通書元昊降知耀州遷環慶路經畧緣邊招討使賞罰嚴明諸羌受命因築細腰葫蘆等砦葛懷敏定川之敗關中震恐仲淹率衆六千援之賊遁去帝為嘉歎進樞密直學士右諫議大夫尋與韓琦開府涇州同領經畧號令明白愛養士卒賊不敢犯境元昊請和召拜樞密副使改叅知政事帝方銳意太平間天章閣召二府條對仲淹上十事皆採用之多於僥倖者不便自是謗毀稍行而朋黨之論起矣因邊警出為宣撫使及去政者益急遂自請罷政事以戶部侍郎知青州卒年六十四贈兵部尚書諡文正

謝黃惣太博見示文集

松桂有嘉色不與衆芳期金石有正聲詎將羣響隨君
子著雅言以道不以時仰止江夏公大醇無小疵孜孜
經緯心落落教化辭上有帝皇道下有人臣規邈與聖
賢會豈以富貴移誰言荆棘滋獨此生蘭芝誰言鼃黽
繁獨此蟠龍龜豈徒一時異將為千古奇願言周召風
達我堯舜知致之諷諫路陞之誥命司二雅正得失五
典陳雍熙頌聲格九廟王澤及四陲自然天下文不復

迷宗師

農

聖人作耒耜蒼蒼民乃粒國俗儉且淳人足而家給九
載襄陵禍比戶猶安輯何人變清風驕奢日相襲制度
非唐虞賦歛由呼吸傷哉田桑人常悲大絃急一夫耕
幾壠遊惰如雲集一蠶吐幾絲羅綺如山入太平不自
存凶荒亦何及神農與后稷有靈應為泣

寄題孫氏碧鮮亭

天地何風流復生王子猷黃金買碧鮮綠玉排清秋非
木亦非草東君歲寒寶耿耿金石生雪霜不能老清風
乃故人徘徊過此君泠泠鈞天音千載猶得聞應是聖
賢魄鍾為此標格高節見真清霸心隱虛白粉筠多體
貌錦籜見兒童上交松桂枝下結蘭蕙叢秀氣靄晴嵐
翠光凝綠水明月白露中靜如隱君子不願湘靈泣不
求伶倫吹鳳凰得未晚蛟龍起何時蕭蕭雲水間良與
主人宜綠塵滿浮世何當拂長袂坐嘯此亭中行歌此

亭際逍遙復逍遙不知千萬歲

明月謠

明月在天西初如玉鉤微一夕增一分堂堂有餘輝不
掩五星耀不礙浮雲飛徘徊河漢間秀色若可餐清風
起叢桂白露生堦蘭高樓望君時為君拂金徽奏以堯
舜音此音天下稀明月或之聞顧我亦依依月有萬古
光人須萬古心此心良可歌憑月為知音

清風謠

清風何處來先此高高臺蘭叢國香起桂枝天籟迴飄
飄度清漢浮雲安在哉萬古鬱結心一旦為君開有客
慰所思臨風久徘徊神若游華胥身疑立天台極渴飲
沆瀣大暑執瓊瓌曠如攜松丘騰上烟霞遊熙如即莊
老語入逍遙道朱絃鼓其熏可以解吾民滄浪比其清
可以濯吾纓願此陽春時勿使飄暴生千靈無結愠萬
卉不摧榮庶幾宋玉賦聊廣楚王情

公路澗

曹公與袁紹
嘗爭據此地

嵩高登靈源北望洛陽注清流引河漢白氣橫雲霧英
雄惜此地百萬曾相距近代無戰爭常人自來去

拜馬澗

傳聞王子晉澗邊遺一驥當時青雲路雞犬亦可致未
必真龍媒悠悠在平地

天門泉

天門有靈泉塵埃未嘗至日月自高照雲霞亦輝庇惟
抱夷齊心飲之可無愧

峻極上寺

徘徊峻極寺清意滿烟霞好風從天來吹落桂樹花高
高人物外猶屬梵王家

中峰

嵩高最高處逸客偶登臨回首日月影正得天地心念
此非常遊千載一披襟

湖山

湖山滿清氣賞心甲吳越晴嵐起片雲晚水連初月漁

父得意歸歌詩等閒發

筠亭

為愛碧鮮亭入夏
姁姁至臺榭競生烟
獨有清涼意高岡
鳳不來幽人此沈醉

風笛

風引湖邊笛馬知
非隱淪一聲裂雲去
明月生精神無為
落梅調留寄隴頭人

渚蓮

武陵誰家子波面雙雙渡空積心中絲未成機上素似
共織女期秋霄苦霜露

天平山白雲泉

靈泉在天半狂波不能侵神蛟穴其中渴虎不敢臨隱
照涵秋碧泓然一勺深游潤騰雲飛散作三日霖天造
豈無意神化安可尋挹之如醍醐盡得清涼心聞之異
絲竹不含哀樂音月好羣籟息涓涓度前林子晉罷雲
笙伯牙收玉琴徘徊不擬去復發滄浪吟乃云堯湯歲

盈盈長若今萬里江海源千秋桂松陰茲焉如有價北
斗量黃金

和楊畋孤琴詠

愛此千年器如見古人面欲彈換朱絲明月當秋漢我
願宮商絃相應聲無間自然召南風莫起孤琴歎

絳州園池

絳臺使君府亭閣參園圃一泉西北來羣峰高下覩池
魚或躍金水簾長布雨怪栢鎖蛟虬醜石鬬羈虎羣花

相倚笑垂楊自由舞靜境合通仙清音不知暑每與風
月期可無詩酒助登臨問民俗依舊陶唐古

鄱陽酬泉州曹使君見寄

吾生豈不幸所稟多剛腸身甘一枝巢心苦千仞翔志
意苟天命富貴非我望立譚萬乘前肝竭喉無漿意君
成大舜千古聞馨香片玉棄且在雙足何辭傷王章死
於漢韓愈逐諸唐獄中與嶺外妻子不得將義士撫卷
起眦血一霑裳於時宴安人滅然已不揚匹夫虎敢鬪

女子熊能當況彼二長者烏肯巧如簧我愛古人節皎皎明如霜今日貶江徼多慙韓與王罪大禍不稱所損傷纖芒盡室來官下君恩大難忘酒聖無隱量詩豪有餘章秋來魏公亭金菊何煌煌登高發祕思聊以攄吾狂卓有梅聖俞作邑郡之旁矯首賦虛烏擬彼歌滄浪因成答為戲移以贈君郎泉南曹使君詩源萬里長復我百餘言純純自宮商念此孤唳鶴聲應來遠方相期養心氣彌天浩無疆鋪之被萬物照之諧三光此道果

迂濶陶潛吾醉鄉

聽真上人琴歌

銀潢耿耿霜稜稜西軒月色寒如冰上人一叩朱絲繩
萬籟不起秋光凝伏羲歸天忽千古我聞遺音淚如雨
嗟嗟不及鄭衛兒北里南鄰競歌舞競歌舞何時休師
襄堂上心悠悠擊浮金戛鳴玉老龍秋啼滄海底幼猿
暮嘯寒山曲隴頭瑟瑟咽流泉洞庭蕭蕭落寒木此聲
感物何太靈十二銜珠下仙鵠為余再奏南風詩神人

和暢舜無為為余試彈廣陵散鬼物悲哀晉方亂乃知
聖人情慮深將調四海先調琴興亡哀樂不我遁坐中
可見天下心

和葛閣寺丞接花歌

江城有卒老且貧憔悴抱關良苦辛衆中忽聞語聲好
知是北來京洛人我試問云何至是欲語汎瀾墮雙淚
斯須收淚始能言生自東都富貴地家有城南錦繡園
少年只以花為事黃金用盡無他能却作瓊林苑中吏

年年中使先春來曉宣口勅修花臺奇芬異卉百餘品
求新換舊爭栽培猶恐君王厭顏色羣芳只似尋常開
幸有神仙接花術更向都城求絕匹梁王苑裏索妍姿
石氏園中挖淑質金刀玉尺裁量妙香膏膩壤彌縫密
迴得東皇造化工五色敷華異平日一朝寵愛歸牡丹
千花相笑妖嬈難竊藥嫦娥新換骨嬋娟不似人間看
太平天子春遊好金明柳色籠黃道道南樓殿五雲高
釣天捧上蓬萊島四邊桃李不勝春何況花王對玉宸

國色精明動韶景天香旖旎飄芳塵特奏霓裳羽衣曲
千官獻壽羅星辰兌悅臨軒逾數刻花吏此時方得色
白銀紅錦滿牙牀拜賜仗前生羽翼惟觀風景朝仍暮
一心歲歲供春賦中途得罪情多端刻木在前何敢訴
竄來江外知幾年骨肉無音雁空度北人情況異南人
瀟灑溪山苦無趣子規啼處血為花黃梅熟時雨如霧
多愁多恨信傷人今年不及去年身目昏耳重精神減
復有鄉心難具陳我聞此語聊悵悵近曾侍從班中立

朝違日下暮天涯不學爾曹向隅泣人生榮辱如浮雲
悠悠天地胡能執賈誼文才動漢家當時不免來長沙
幽求功業開元盛亦作流人過梅嶺我無一事逮古人
謫官却得神仙境自可優優樂名教曾不恹恹弔形影
接花之技爾則竒江鄉卑濕何能施吾皇又詔還淳朴
組織文章皆棄遺上林將議賜民畋似昔繁華徒爾為
西都尚有名園處我欲抽身希白傳一日天恩放爾歸
相逐栽花洛陽去

中元夜百花洲作

南陽太守清狂發未到中秋先賞月
百花洲裏夜忘歸
綠梧無聲露光滑天學碧海吐明珠
寒輝射空星斗疎
西樓下看人間世
瑩然都在青玉壺
從來酷暑不可避
今夕涼生豈天意
一笛吹銷萬里雲
主人高歌客大醉
客醉起舞逐我歌
弗舞弗歌如老何

野色

非烟亦非霧
冪冪映樓臺
白鳥忽點破
夕陽還照開
肯

隨芳草歇疑逐遠帆來誰謂山公意登高醉始迴

送何白節推宰晉原

盛府兼名邑榮歸指故林多年望鄉淚萬里倚門心江
館春寒薄山程晚翠深板輿迎侍日桃李正芳陰

送韓瀆殿院出守岳陽

仕宦自飄然君思豈欲偏纔歸劍門道忽上洞庭船墜
絮傷春日春濤廢夜眠岳陽樓上月清賞浩無邊

遊烏龍山寺

高巖指天近遠溜出山遲萬事不到處白雲無盡時異
花啼鳥樂靈草隱人知信是栖真地林僧半雪眉

江干閒望

江干日清曠寓目一楮昂落葉信流水歸雲識舊峰蘭
蓀誰共采鳬雁自相從莫愛蘋風起波來千萬重

洞庭山

吳山無此秀乘暇一遊之萬頃湖光裏千家橘熟時平
看月上早遠覺鳥歸遲近古誰真賞白雲應得知

虎丘山

昔見虎耽耽今為佛子巖雲寒不出寺劍靜未離潭幽
步蘿垂徑高禪雪閉庵吳都十萬戶煙瓦亘西南

應制賞花釣魚

萬彙嘉亨日皇心豫宴辰華林新濯雨靈沼正涵春帝
幄紛仙藹天鈎擲錦鱗洋洋頒睿唱賡頌浹簪紳

芝山寺

樓殿冠崔嵬靈芝安在哉雲飛過江去花落入城來得

食鵠朝聚聞經虎夜回偶臨西閣望五老夕陽開

赴桐廬郡至淮上遇風

聖宋非彊楚清淮異汨羅平生仗忠信盡室任風波
舟楫顛危甚蛟鼃出沒多斜陽幸無事沽酒聽漁歌

瀑布

迴與衆流異發源高更孤下山猶直在到海得清無
勢鬪蛟龍惡聲吹雨電麤晚來雲一色詩句自成圖

堯廟

千古如天日巍巍與善功禹終平澤水舜亦致熏風江
海生靈外乾坤揖讓中鄉人不知此簫鼓謝年豐

八月十四夜月

光華豈不盛賞宴尚遲遲天意將圓夜人心待滿時已
知千里共猶訝一分虧來夕如澄霽清風不負期

試筆

偶緣疎拙得天真豈問前途屈與伸車馬縱能欺倦客
江山猶可助騷人懶如叔夜書盈几狂似淵明酒滿巾

况有南牕姬易在此心那更起纖塵

送石曼卿

河光嶽色過秦關英氣飄飄酒滿顏
賈誼書成動西漢
謝安人笑起東山
亭途去覺雲天
近舊隱回思水石間
此道聖朝如不墜
疏封宜在立譚間

依韻酬太傅張相公見贈

出處曾無致主功
南陽為守地猶雄
醉醒往日慙漁父
得失今朝賀塞翁
七里河邊歸帶月
百花洲上嘯生風

卧龍鄉曲多賢達願預逍遙九老中

知府孫學士見示和終南監宮大保道懷因以綴

篇

玉皇近侍請修真賜得南山十里雲樽有聖賢聊自慰
鼎多龍虎復誰分謝家山色朝晡見陶隱松風寤寐聞
萬物已齊無一事獨醒微笑醉醺醺

酬滕子京同年

謝家風雅若為酬散吏方耽海上遊疎懶幾忘傳筆夢

寂寥仍有負薪憂欲歌蘭雪歸真隱敢向簪軒競急流
如共茂先占氣象莫言神物在南州

遊廬山

五老閒遊倚舳艫碧梯嵐徑是程途雲開瀑影千峰挂
雨過松篁十里鋪客愛往來何所得僧言榮辱此間無
從今更識逍遙旨一聽升沈造化爐

馬跡仙壇

靈壇拱上百神清碧塢紅霞相映明曲逕已無青草合

亂峰時有白雲生
亭亭翠纛高山矗
隱隱狂雷落石轟
待得九霄鸞鶴馭
玉書應改地仙名

歸鴈

稻梁留不得
一一起江天
帶雪南離楚
和春北入燕
依依前伴侶
歷歷舊山川
木葉程猶遠
梅花信可傳
子規啼到曉
鸚鵡鎖經年
應羨冥冥者
東風羽翼偏

依韻和延安龐龍圖柳湖

種柳穿湖後
延安盛可遊
遠懷忘澤國
真賞即瀛洲
江

景來秦塞風情屬庾樓劉琨增坐嘯王粲乍銷憂秀發
千絲墮光搖匹練柔雙雙翔乳燕兩兩睡馴鷗折翠贈
歸客濯清招隱流宴回銀燭夜吟度玉關秋勝處千場
醉勞生萬事浮王公多雅致思發共仙舟

和延安龐龍圖寄岳陽滕同年

優遊滕太守郡枕洞庭邊幾處雲藏寺千家月在船疎
鴻秋浦外長笛晚樓前旋撥醅頭酒新炮縮項鱖宦情
須淡泊詩意定連綿迴是偷安地仍當飽食年只應天

下樂無出日高眠
豈信憂邊處

缺

兵隔一川

淮上遇風

一櫂危如葉
傍觀亦損神
他時在平地
無忽險中人

題翠峰院

范蠡舊宅

翠峰高與白雲間
吾祖曾居水石間
千載家風應未墜
子孫還解愛青山

過嚴灘

漢邑六合網英豪
一箇冥鴻惜羽毛
世祖功臣三十六

雲臺爭似釣臺高

慶朔堂

慶朔堂前花自栽
更移官去未曾開
年年憶著成離恨

祇託春風勾管來

按誌公曾植九松於堂前間以雖
卉未幾即移潤州故作此詩所謂

芝產三莖松栽百尺者是也而
碑史謂公別有屬意豈其然乎

姚嗣宗

附

關中人與張吳二狂生稱三俠范希
文見其題壁詩驚異之表入幕府

題驛壁

踏破賀蘭石掃清四海塵布衣能辦此可惜作窮人

題空同山寺

南粵干戈未息肩五原金鼓又轟天空同山叟笑無語
飽聽松聲白晝眠

范純仁

字堯夫仲淹次子幼警悟八歲能講所授書以父
任為太祝中皇祐元年進士為養親久不拜官父
歿始出任以著作佐郎知襄城縣兄純祐有心疾
奉之如父藥膳居服皆躬親時節之宋庠薦試館
職亦力辭曰輦轂之下非兄養病地也簽書許州
觀察判官召為侍御史因議濮王典禮與執政不

合請出通判安州歷陝西轉運副使召還知諫院
力奏王安石變法害民作尚書解以進安石大怒
乞加重貶賴上知其無他命知河中府徙知成都
路轉運使所至戒州縣停斂法勿遽行安石益怒
左遷知和州慶州中罹謗謫復知河中諸路哲宗
立召為諫議大夫元祐初進吏部尚書同知樞密
院事歷右僕射兼中書侍郎會黨論大作純仁力
主渙羣反致攻擊求罷連知二郡尋召還復拜右
僕射及章惇為相堅求去猶以救呂大防之貶竄
忤惇意安置永州時兩目已失明怡然就道居三
年徽宗即位顯肅后同聽政即日授純仁光祿卿
分司南京復遣中使至永賜茶藥諭虛相位以待
純仁捧詔感泣而已乞歸養疾徽宗
不得已許之年七十五卒謚忠宣

累約舍弟純禮以職事未至

落葉猶同飛寒鳥猶並枝我汝獨何負不得長相隨偶
為細累拘跬步成天涯後日更遠適會合倍難期尚願
家國寧且作千日離悠悠百年間幾別顏即衰從宦非
我志功名徒自欺雖言千寸祿坐使手足違逐末背本
心得一萬已遺爾我麤有識此事良同悲安得長洲田
清水稻百畦將汝入故廬親戚坐成圍幼弟就文史長
兄近砭醫孝謹奉諸宗祭祀潔四時此外逐風月對酌
白酒卮畢世為善人不負生育慈斯志倘未遂終為路

旁嗤

會師宰

憶昨相逢際風喧洛城春芳菲供愁眼衣袂偕京塵艱
難各有適會合寧逡巡君歸來何時我約赴無因自此
還相望渴臆生埃塵晚歲留故邱山川寂無鄰落日送
樵牧蒼烟起荆榛季弟自城至開顏慰天倫遽言長者
車相過止來晨茲遇出意表候迎屢冠巾寒途馬歷歷
幽扉犬狺狺野夫競走報似喜得嘉賓空堂揖顏色和

氣相氤氲開尊共燈燭笑語何諄諄朝遊禹門寺暮歷
清伊濱危龕儼金像遠波舒翠鱗石樓最清絕就宿同
裊茵灘聲夜逾急天然謝韶鈞閒談盡物理至樂還天
真人生足羈束此會猶難頻所期道義心白首長相親
謁辛化光

濃陰結秋意疎林嘯風聲時節感壯懷挈酒慰友生友
生冰玉士節行映古清十五簪儒冠四十無華纓家貧
道彌富身困譽益榮殷勤數賓侶足趨顏巷輕高齋面

幽圃修筠擁軒楹班班寒露叢競吐籬下英食具簡且
潔盤蔬亦晶明飲適言笑和至樂不亂情郁然蘭芷芬
薰灼通心誠因嗟朝市間利欲空自兵

蚤行

夙駕冒輕寒身勞意自閒鳴鷄起遙野殘月滿空山水
落灘沙白林稀落葉殷東方上朝旭始免畏途難

寒食日泛舟

合友逢佳節攜尊泛碧流溪風消酒力烟樹入春愁羣

鴨開波練疎雲透月鉤平生懷古意最羨五湖遊

和韓子文題王摩詰畫寒林

摩詰傳遺跡家藏久自奇高人不復見絕藝更誰師
水石生寒蚤烟雲結雨遲筆端窮造化聊可敵君詩

零陵憶弟妹

感秋懷弟妹憔悴客瀟湘他日常星聚衰年隔雁行
既盲難引望垂老易悲傷安得如鴻鵠高飛向汝傍

與王弱翁遊龍門

誰知造化擘巍峩千古伊流向此過四面喬松擁香剎
兩崖蒼石束寒波身閒愈覺良朋貴詩拙翻羞好景多
宜向諸方縱蕭散明朝望洛下長坡

和王微之同持國泛舟登樓

故人還喜笑言同把酒相看似夢中老去卜鄰逢晏子
從來解榻賴陳公畫船穩泛平溪綠層觀高橫落日紅
莫訝狂歌先盡醉預愁羈旅向山東

和韓侍中垂蘿洞

勝遊今屬相君家
臺榭高開碧水涯
森聳綠梧常映日
縈紆寒溜曲穿花
藤牽柔蔓垂長帶
竹引新萌走蟄蛇
下吏不歸我醉并
卻愁歸汙繡茵車

和韓侍中春陰馬上

三月芳菲欲暮天
可堪零雨晝連綿
潤催隴麥將黃節
寒阻春蠶趣蚤眠
疎柳拂牆難結絮
嫩苔鋪砌已成錢
牡丹只待晴陽照
看吐新花一尺圓

和韓侍中登廣教院閣

兩陪千騎叩禪關
每聽高吟解客顏
吉甫壯猶方北伐
謝公高興在東山
僧軒深閉芳菲靜
春晝初長鳥雀閒
浮覽不知歸逕晚
火城看逐隼旗還

和韓侍中初夏遊興慶池

池邊喜逐綵旗行
初夏亭臺照水明
筠籜乍開春後綠
林梢長帶雨來聲
新荷獵獵香風遠
深洞沈沈晝景清
珍重相君憂國意
宴終遊亦念農耕

謝師厚寄同黃堦魯直唱和

忽得穰郊信，翛然病魄醒。
懷賢心獨在，感舊涕偏零。
南斗占神劍，西豪聚德星。
卧龍看復起，失馬顧曾經。
冰玉清相照，芝蘭遠更馨。
微官應念我，白首候戎亭。

春日寄許州韓持國

湖上春遊阻重陪，朱轡紅旆想徘徊。
鶯花對席應相惱，不見頻攜醉客來。

雪中池上

碧玉為池白玉隈，千林萬木盡花開。
攜賓欲覓開尊處，

祇得清香辨野梅

吳中復

字仲庶興國永興人進士及第知義眉縣有廉幹
聲用中丞孫抃薦為監察御史富弼開六漯河賈
昌朝助宦官劉沆陰中之詔中復往治其事立解
以彈宰相劉沆改右司諫以待制出知澤州歷河
東轉運知江寧府忤執政削一
階提舉玉隆觀卒年六十八

西園十詠

西樓

信美他鄉地登臨有故樓清風破大暑明月轉高秋朝

暮岷山秀東西錦水流賓朋逢好景把酒為遲留

衆熙堂

亭枕方塘上軒開四照新花涵清露曉風卷綠波春日
暖眠汀鷺荷翻躍錦鱗熙熙遊宴地行樂慰西人

竹洞

陰森過百步屈曲鎖莓苔翠色寒無改清風時自來葉
籠蒼玉幹路入碧雲堆吏散無公事支筇到幾回

方物亭

草木蟲魚部披尋自古無飛沈天產異生植土風殊物
色隨心匠形容記績圖虛亭玩真意浩思滿江湖

翠栢亭

衆木墜黃葉皴皮抱翠枝自然根性異不為雪霜移靈
潤承多露清陰貫四時婆娑歲寒意每到坐遲遲

圓通菴

對此圓通境陶然勝靜齋觀空無物我扣寂外形骸燕
坐埋遺照虛名莫疾懷人間憂樂地所喪甚山崖

琴壇

瀟灑琴壇上賢侯養道情無今亦無古求意不求聲林
邃風初靜雲收月乍明拂絃成一弄塵思浩然清

流杯亭

結客乘公暇流觴逐浩歌亂峰晴倒影曲水宛迴波小
海逢元已蘭亭記永和西州行樂事應比晉賢多

喬枏亭

木占西園勝亭延上客過色無花卉妬堅為雪霜多幹

有千年秀根含一氣和明堂求柱石可得老巖阿

錦亭

簾幕臨雕檻
牕疏照爛霞
園林初過雨
風日猛催花香
入遊人袖紅
堆刺史家
四時俱好景
終不似春華

沈邁

字文通錢塘人用蔭為郊舍郎舉進士廷唱第一
以官故改第二通判江寧府歸奏本治論仁宗嘉
之除集賢校理久之修起居注遂知制誥因父扶
坐事免求知越州徙杭州精於吏事令行禁止閭
閻長短纖悉必知治聲大著召知開封府遷龍圖
閣學士拜翰林學士判流內銓丁母憂服未竟而

卒年四十
時論惜之

和李審言上元寄王巖夫

此都豪麗歲仍豐
此夕都人凱樂中
車馬笙簫十里至
樓臺燈火九衢通
香輿軋軋凌風駛
粉袂翩翩照地紅
病守行春應勉彊
要堪攀倚少年叢

戲盧中甫

晴日春風花氣浮
少年嬉逐滿揚州
誰憐居士身常病
獨坐空船理白頭

還家自嘲

意昨邊城初見春
纖纖垂柳正爭新
不知遠客貪歸意
欲把柔絲繫畫輪

田况

字元均陽翟人家開封少有大志好讀書為詩文
立成初舉進士賜同學究出身不就後中甲科補
江寧府推官服除補楚州團練判官用舉者遷秘
省著作通判江寧府數上書言事仁宗將用為諫
官會夏英公范文正公經略陝西請以為佐又副
韓公宣撫陝西除龍圖直學士知成德軍數有功
移秦鳳路經略安撫使丁外艱起知渭州遂用諫
議大夫知成都府蜀人愛之比於張忠定上賜書

獎諭召為樞密直學士項之遂拜樞密副使尋以
檢校太傅充樞密使嘉祐三年請致仕八年二月
卒年五十九

三月三日

麗日照芳春良會重元巳陽濱修祓除華林程射技所
尚或不同茲俗亦足喜門外盛車徒山半列鄮市彩棚
飛鏑遠醉席歌聲起回頭望城郭煙靄相表裏秀色滿
郊原遙景落川埃目倦意猶遠思餘情未巳登高貴能
賦感物暢幽旨宜哉賢大夫繇斯見材美

遊淨衆寺

千騎出重闌嚴祠淨宇鄰映林沽酒旆迎馬獻花人豔
日披江霧香颺起路塵韶華特明媚不似遠方春

汎浣花谿

浣花溪上春風後節物正宜行樂時十里綺羅青蓋密
萬家歌吹綠楊垂畫船伐鼓臨芳淑綵閣凌波汎羽卮
霞景漸曛歸櫂促滿城懽醉待旌旗

寒食開西園

春風寒食節夜雨晝晴天日氣熏花色韶光徧錦川臨
流飛鑿落倚榭立鞦韆檻外遊人滿林間飲帳鮮衆音
方雜還餘景更留連座客無辭醉芳菲又一年

劉沆

永新人天聖間進士長於吏事任數多智每刺探
權近過失脅持取利歷權知開封府參知政事同
平章事然以附張貴妃得進君子譏之家傳盛稱
其至和中定策立儲與文富同功然以史考之譖
毀潞公及沮排趙抃
范師道忝相位多矣

小孤山

擎天有八柱此一柱仍存石聳千尋勢波流四面痕江
湖中作鎮風浪裏盤根平地安然者饒他五嶽尊

聰明泉

義山山下有靈泉泉喚聰明自古傳四百年中三出相
不才何意繼前賢

王陶

字樂道京兆萬年人第進士仕至太常丞而丁父
憂乞以所遷官追贈其父詔允之服闋除太子中
允遷監察御史裏行頗以能言著聲出知衛州改
蔡州召為右正言英宗即位加直史館修起居注

知制誥進龍圖閣學士知永興軍神宗立遷密直
拜御史中丞加觀文殿大學士卒陶始受知於韓
琦驟加獎拔既欲自取重位百端傾琦上遂薄其
為人又陶微時寓京師苦貧其友姜愚氣豪樂施
衣食多所取資又捐數百千為之營娶及陶貴尹
洛愚老而喪明往謁之陶相視漠然但出尊酒而
已士論益薄之

有竇復者世居鎮戎能道邊事

君不見鎮戎德順弓箭手耕種官田自防守相圍置堡
禦強軍下視賊庭殊不有殺羊取骨然艾炙試卜賊兵
知入寇都拔招呼入堡居堡外重圍百里餘牆低城小

不難破賊箭如棚城上過堡中不及數十人且鬪且罵
且欣欣登陴斫門謂平取應弦死傷已無數牕間走箭
射其魁一箭已聞哭聲舉爭將錦囊裹賊尸鳴金收衆
唯恐遲不唯城堡依然固吾衆不傷毫與釐自從干戈
動四鄙覆軍殺將曾無恥朝廷未省遺邊功何事此勲
不聞紀安得天兵百萬衆盡如此輩堅且勇

宋元詩會卷八